

西園聞見錄

西園聞見錄卷之六十四目錄 外編

兵部十三

餉饋

前言

汪若霖 二則

萬崇德

陳良訓

王夢尹 二則

附天啓元年戶科參定稽核錢糧

倪應眷 二則

沈演

侯恂 二則

往行 四

清軍

前言

楊士奇

馬文升

王瓊

王憲

楊廉

吳時來

王世貞

往行 四

西園聞見錄卷之六十四 外編

嶺南 張 萱孟奇甫 輯

兵部十三

餉饋

前言

萬曆三十四年戶科給事中汪若霖曰今天下獨苦邊餉爾太倉歲入四百萬而竭蹶輸九塞以爲常非制也國初倚民屯矣偶告急則議京運未有放濫如今日者也夫烽火非數警也影占逃亡之數又甚夥也不可清乎民屯宿逋與夫地荒蕪而不治者不可問乎迺餉臣常以節括報功矣不可以其數相抵論乎類造虛章何關實算徒取國膏血外啖虜而內媚要津貴人以飾歡卽京營十萬詭冒卑虛安可窮詰不謂國家以全力注封疆翻成積費也按萬曆二十九年歲報御覽冊薊州主客兵歲額銀五十九萬九千五百一十一兩八銀五分永平鎮主客

兵歲額銀三十三萬四百一十五兩九錢一分密雲鎮主客兵歲額銀五十三萬四千五百六十七兩五錢三分昌平鎮主客兵歲額銀一十九萬四千七百四十九兩四錢七分易州鎮主客兵歲額銀二十萬七千三百二十五兩八錢九分主兵糧九萬二千四百二十石六斗八升料四萬二千八百二十九石五斗二升草四萬五千四十束寧夏鎮主客兵歲額銀三十一萬一千二百四十一兩三錢六分主兵糧五萬一千五百二石斗料九萬八千三百九十一石七斗六升草一百七十一萬七千六百八十八束甘肅鎮主客兵歲額銀五十九萬四千七百四十兩一錢主兵糧二十一萬二千二百七石五斗九升草一百六十八萬三千一百九十六束固原鎮主客兵歲額銀四十八萬五千六百七十八兩三錢七分主兵糧二十六萬六千七百二石六斗一升料一千四石四斗草一十六萬八千九百六十八束

又曰神農云雖有金城湯池非粟不守晁錯亦云募民入粟實邊國家九邊歲額洪永間一百餘萬有屯田本色中鹽輸粟成弘間二百餘萬

世宗朝增至三百萬今京運四百萬矣司農一歲所入僅足支費稍有  
逋負旋稱不給邇者宣府大同頻年飢饉剗西月無見糧軍士困苦不  
堪戰馬餓死累累人情洶洶數相偶語悅中叫囂旦夕不測遼東每軍  
月糧止四錢又每遲至三四月不沾實惠揭貸出息而官司又有公私  
使用之扣十鎮年例所欠至一百五十餘萬歲終不得給當事諸臣始  
議借濟似矣將借于各省之積逋則兌解何時是待西江之水以救涸  
鮒將借于罔寺之馬價則補給何日是剗心腹之肉以支兩腋總之非  
計也愚竊謂籌邊者當察其耗邊之源然後緩急圖實邊之策顧耗之  
之途亦夥矣有就邊而耗者有耗于內而實爲邊耗者老家不能受甲  
而尺籍徒存則冗食者耗急則召募未列行伍先取安家則虛糜者耗  
募置親兵將所蓄家丁籍爲勝兵而名額多增費復幾倍則濫支者耗  
此皆就邊而耗者也緹騎冗員而食無功之祿大官冗役而享無勞之  
奉內監冗匠而叨餼廩之入凡此皆耗于內而實中于邊者也內帑貯  
蓄幾何乃堪此輩厄漏哉奈何不簡而清也至求所爲實邊者則莫屯

鹽若矣鹽不開中也而改折則鹽政荒屯不予粒也而折色則屯政廢其弊也鹽以供私販屯以資乾沒士飽馬騰顧安所冀請自今復中鹽初制凡運司額鹽非邊引不得關支卽餘課俱令赴塞下輸粟芻俾內地諸商勢不得不外徙塞下經營產業則拋荒地土不患開墾無其人而當事者又必親歷邊境相度疆土某爲舊屯豪勢占據者清理之某爲曠土堪興屯利者開拓之其屯丁或因土著或募新軍或徙附近或召民佃設法安置給以牛種暫免徭賦待墾熟後然後收租安邊足用計無踰此蓋屯與鹽兩者若不相蒙而利害實相關惟開中行則邊民爭爲力農儲粟以應商急商急欲得粟則又爭爲募丁墾荒以便供輸商爭爲募丁墾荒則屯軍之貧無力者與巨家大賈錯壤以畊而緩急亦獲通有無助守望又且樹藝成林穰穰相因塞下粟不可勝用而商之報中便軍之芻餉亦便百世之利也宋人有言國家閒暇北虜安靖不及是時少爲根本慮忽有小警相顧無策不免腴內郡膏血補邊方瘡痍內外俱困不知其所止矣嗚呼此寧獨爲宋人告也說者又謂榆

林鎮城四望黃沙不產五穀不通貨賄芻糧仰給腹裏米珠薪桂師不宿飽萬一虜駐魚河糧道險遠城中坐困故欲于府谷至葭州由黃河而上造舟轉運以濟清水木瓜孤山等處亦一便計也而復徵本色設立倉場尤宜汲汲至復登州海運以給河東十四衛錫新增牧馬子粒通居庸桑乾陸輓達蘆溝舟運以駐宣府是不可不深長思也又按各邊月餉法曰折色者六月本色者六月在邊者折銀七錢又曰本折間支此通例也然春夏而米價騰踊銀一錢止易粟數升則始與之折銀秋冬而米價稍平倉庾稍積則始與之本色毋乃驅之飢而罷病且死乎誠慎簡邊帥釐革厥弊庶庚癸可無呼矣

萬曆四十八年督餉御史萬崇德疏曰遼自被兵以來民間蓋藏搜空欲盡田中耒耜停閣俱惟附近之村屯恃兵馬之收集按時播種幾幸有秋詎意六七八月間旱魃爲虐草木盡枯無穀則民絕食枵腹立斃無草則馬腹絕食斷芻卽倒援兵雖資外運海運終慮艱難况運貯無幾其何能濟倘後輸不繼恐民有飢色兵有離心內苦倒懸之莫解外

苦攻掠之莫恃此時卽竭太倉而往餉罄全帑以往犒而亦何救于危  
遼之數哉在廷諸臣鯁鯁陳謨無不謂計欲救危遼當先飽士馬臣愚  
謂計欲飽士馬必當備糧餉蓋折色之糧尤易那處而本色之糧實難  
猝辦也先是督餉侍郎李一本爲今歲海運達通明春運餉未備懇恩  
截留漕米十五萬應濟蒙下部允給矣此言明春之新運未至閒暇可  
以運發而來于今秋之旱災民事尙多可慮也近讀經按遼旱之疏始  
知遼方奴賊狎境簡兵秣馬以施訓練之方豈得窘米黍之用查得遼  
東一歲約用本色二百餘萬石內運派過一百五十六萬石餉司單崇  
議召買米六十萬石今遼旣旱荒無可召買所議之數勢不得不借資  
截漕矣但召買行于順永保河及眞定五府爲數已多卽增之不過二  
十萬而止今勢急燃眉無可爲計非再截漕米二十萬石貯于天津運  
抵遼陽萬萬不可夫漕儲根本之需臣非不知其不可輕截但內地與  
外遼安危存亡相距懸絕且軍士赴倉頭領米出卽易錢每石不過二  
百文今扣新餉抵搭配發利反倍之軍必樂從實出兩便故謂之漕可



截也至召買馬料必于五府地方酌量發銀勒限報竣今方秋成詎勉從事乃克有用然餉以贍軍而舟以運餉有纍纍之米豆必借纍纍之船隻聞寧前道臣王化貞監造運船整木扣底不畏風礁體既堅固價亦省便板木不難于購求工匠不難于徵調所當亟取快巧木匠厚其餼廩相機以造又募占風汛之長年以便其撐駕麻灣一路當不患船之不足矣淮安船隻果如臣議添一道臣專理其事廣造廣募可必無悞若浙江協助淮安之船至今尙未發到實爲玩慢倘別有效尤遼事去矣以無急公之念何望滅虜之功故意逗遛悞遼悞國容臣查的該道每官另行參處外臣謹同督餉侍郎李具疏懇請截漕二十萬石仰祈速下該部復議乘今漕米到津便于截留過此津頭須煩轉挽機不可失是在該部之速爲覆耳召買豆料隨地酌量其打造船隻并祈天語申飭不得悠悠泄泄遼東旱災之極俟按臣查勘明白發賑以濟庶三韓累卵之地士馬得以飽騰而奴酋游釜之魂且慕闕下臣等拮据遼事亦大有所憑式矣其于危遼未必無補矣

陳良訓曰催餉有當議者部司官斷不可違夫餉亦每省數十萬或數萬爾撫按專制一方曾不畢智竭慮爲皇上致之闕下設撫按何用撫按既總于急公不爲皇上致之闕下部司官去又何用夫部司官等于撫按也部司之威靈豈勝于撫按道府州縣也迨至號令不行部司束手而撫按且藉口曰差官已日擊矣勢如之何司農又卸責曰吾業已差官矣姑候其至上下相推餉歸烏有而徒爲部司官添榮還里之樂爲不肖有司開筵楚搜括之門驛遞騷煩供應增設嗟嗟害難言也恐此說終難議行也餉之不完其來有三有自民間逋者有自州縣匿者有自司道那解別用者此在各府縣先清欠餉之窟穴而後增完餉之實效體訪得實明白具疏指明入告方自歸着而第是泛泛查參曰某知府幾分某知縣若干故事塞責恐于今查餉不關切矣

工科王夢尹曰一兵額之當限也臣語毛文龍曰兵多則難精而況餉不給矣爲今日計惟汰冗食以足餉足兵以強兵或牽制或進攻乃克有濟耳東江兵雖稱十五萬而屯田者盡充其中合無將現在之兵令

文龍精選一番或三四萬或五六萬就津登之本折逐項酌算務令兵不浮于食如有不給而仍以屯田者足之其屯兵就各兵父兄子弟約定名數務足屯田之用戰士則厚其廩糧屯田則保其家室其有餘之衆或量移內地或移之寧遠壯者籍爲兵弱者籍爲屯在戶部既不苦無米之炊在文龍亦不苦庚癸之呼在遼民旣免凍餓之虞又遂生全之路上感國恩下念家仇而滅虜之氣亦百倍矣若添餉以責恢復恐中原之物力有限海上之需待無窮是在皇上睿慮特裁非臣所敢妄議也

又曰海外屯田其收入也有時其支給也有限而與商人及朝鮮貿易統賴餉銀是遼人之存活全賴內地之轉輸也獨天津糧米運發及時而山東餉銀發解未免後時彼管餉之奸弁遂得借口開報不清以致海外造冊竟不收入不思遼民孤島中懸釜待炊能待此西江之水乎合無申飭該省預爲解給務要當年之餉完在五月以前庶六七月間風便可至倘稍遲月日秋風一起徒充魚龍之腹不然亦以今歲之餉

而療來歲之飢矣

天啓元年戶科參定稽查錢糧凡省直之額解俱屬于餉司各邊鎮之年例俱發于太倉出納之事原自井然惟是解到之日既照省分而隸之于本司及轉發之日復照鎮地而承之他司卽十三司中已有錯綜不一矣至于餉司查餉止據其所解之數不復稽其完欠而太倉發銀亦止據其所出之數無復憑其源流此中外所以相蒙出入所以不相照而冊籍徒具永無清楚之期也先是本科都給事周某條請查盤已奉旨又巡視御史周某悉索該部十三司應解太倉之銀按其故籍而理其舊額兜底查算可謂洞悉其竅矣今本科給事阮某又擬爲庫司合部之議每月以朔望令各司有相磨對則于省直之入數可以通查而于邊鎮之出數毫無錯漏其法與巡視相濟均引繩批根鑿鑿可行者總之外解之弊詭巧萬端更須責令各省直于解文內明開係其年某項該銀共若干通解則開全完未完則開實欠每次解俱如此開載則數目分明一覽盡知矣

天啓元年督餉御史倪應眷上條議一曰起解本折之有稽遲督餉必先安民安民無如察吏夫司農不得已每畝新增九釐就其中量地利之肥瘠天時之豐歉原額之輕重而斟酌布之俾合各州縣原派之數酌派一定大書曉諭以便完納此誠良法至司道以下俱係親民之官因心洒潤觸手成霖况新派之煩征尤賢者苦心調劑之日藩司如福建河南以存留而濟餉匱州縣如海州密雲華亭長清以撙節而抵加派上不廢事下不病民皆諸臣分所當爲亦力所能爲者一曰轉運舟車之有延緩夫遼餉歲用折色三百六十萬本色二百餘萬折色絲毫皆有實在之用若本色一石海運凡以二鍾致之矣舟車脚費之費非七百餘萬不可國初以天下全力海運七十萬茲以山東天津二處之力而運二百餘萬其能辦乎登萊明習運事去年運發六十萬餘遼人藉以無恐天津惟恃道臣賈之鳳今且以病告矣未經兩院題請法難徑去業經加銜旌勞誼無可去計必爲運務而留第天津省直協助船隻最急此日風和水柔舟行若履平地倘呼之不應候至秋深駭浪驚

鹽實多不測依沙沿泊島必至后期萬灶不黔三軍立槁諸臣能免悞事之罪乎夫陸運原議值僱至遼陽矣而又責運瀋陽以爲長運逼近虜穴未免風鶴耳況人情短運易于弛擔無不樂往長運疲于奔病動有趑趄須以短僱更番之說行之遼陽以西庶人心安而招募可行遼陽以東必以汰軍供運實爲兩便蓋倉去內地甚遙驅畿民遠涉勢必不能運費部臣任之運夫經臣任之有兼濟而無偏累矣京邊改本東充旣稱甚難則截山東漕以補運加新餉買米以補漕于餉有賴而于漕無損豈非兩利之計乎一日支消錢糧之有溷淆自軍興以來部發銀一千一百一十八萬七千六百四十有奇凡經清查曾未一報聞之蓋倉米穀委積者任浥爛盜竊此斷斷乎不可不清者經臣宜集文武各道將取諸兵名冊參伍之舊兵若干新兵若干工匠若干馬匹牛騾若干細加簡閱嚴爲訓練列爲等第兵數旣合然後以實達部部臣照兵科餉經臣計口受餐而又責成于監軍各道日逐清理月例之扣除有禁家丁之冒支有禁逃亡之影射有禁料豆之侵減有禁升斗之參

差有禁各道任勞任怨與餉司細心磨算按季冊報關以內各司道爲政凡糴本脚價舟車僱造舵工水手援兵防兵月糧等項種種支放名色混淆稽數季報以憑歲終查核一併奏聞庶幾鼠雀無所因緣爲奸而運去之一絲一粒皆有着落矣

巡按倪應眷曰糧草軍馬之命也當事者可易視哉况東事茫茫蕩平日遠物力有限久用卽窮何不亟議屯田之法也或謂分土已定無田可屯何如擇民間之土地多價易之立官屯田亦是正法也然世間人正知吃現成飯用現成物耳幾個家事視國爲軍馬圖永賴者哉卽求心計之長如督餉道錢士晉者亦難屈指也憐永郡災慨然以米豆爲已任掣前年未用之價買運于天津于民不擾于軍自裕則眞餉督者矣第米豆乃便運之物惟草束則最難運也經撫憐災郡兼取隣封亦臨渴掘井之計耳使當秋初卽議採青何至強災民以不堪耶雖名曰官價非白取民者然物粗路遙每束所值幾何而往來之費不啻十倍也有法于此未秋之時擇一精廉判官議定市草之場價比市豐誰不

熙熙富而多草者爭赴于市貧而無草者且不難爲販草之行等官價耳以官價迫民則苦矣以官價與民則甘矣唐陸宣公之議若爲今日而作者倣而行之眞可對症舍採青利市別議積草者除是天降地湧可耳天地不能爲我積而我不豫辦甚至索于隆冬近寒之時此軍民兩困之術也

天啓六年刑部侍郎沈演疏曰頃議遼餉臣亦在列實見新餉支給全非國制關係重大不敢輕言國制邊軍月餉八斗今至每月一兩八錢幾再倍矣而兵無八斗之實惠至枵腹而譁則不計處本色之過也取之民者倍稱則民生自蹙給之軍無半菽則士心日渙以關門米價計措本色一分卽當折色三分之用矣趙充國謂糴二百萬斛穀差不敢動曹操田許下杜預田宛葉太祖方入金陵卽命康茂才爲營田使欲舉大事先計本色以銀充餉起自近代貴買不宿飽輕資易逃亡至覺華右屯積穀胡不給軍乃以資寇更不可解不于此計算乘除稽查出納爲軍民兩利之術曰催科曰搜括事例舍此言無奇策然天地生財



止有此數制取巧取皆出于民安有定額之外歲加五百八十八萬而可以爲常者尙缺額二百餘萬更派則竭澤別項終畫餅如此景象朝不及夕何待有識方知其危

侯恂疏曰今遼東之役土兵邊不可再抽而家丁非其主者不歸死也如是而言餉十三萬之兵以五百萬之餉餉之原自不少况又加以內帑之五十萬乎太僕巡青之二十萬乎客歲未完之二百八十萬乎截漕三十萬石可當三十萬乎鹽局淘河銀兩更有四十萬乎是皆實數可佐新餉之不給者但慮今之征收猶似昔之拖欠請無徒責州縣而責之司道嚴其考課重其參罰俾督催屬邑刻期赴解卽衝疲災荒力難追完亦以別項抵足惟呼庚問癸之新餉斷令絲毫無虧而又覈實用之二三年間當可支持會議之舉第當議屯田議鑄錢議鹽策與夫十庫之改折各工之侵欺光祿緹騎之虛蠹作何修舉作何釐刷以濬不涸之源塞濫觴之竇而搜括那借事例一切議條可概報罷也搜括那借多煩爭執而事收息于官償責于民也此部餉之定著不煩再商

者也

又曰遼左本色絕少軍多枵腹故運法最急而索車至一萬八千輛用推車之卒至四萬七千人則決不可何者內地買牛買騾騾擾已極再加驅迫人心必至動搖蕭牆之禍所不忍言且千里重蕭不堪費恐復爲牛騾之續也幸經臣無訐計部之商量從長設處或用抽軍或用汰兵主定撥運之法夫東南之粟駕舟于淮揚銜尾于天津順洋以達蓋州而去遼瀋不遠矣通算一人之力一日之程最少任担五斗最近任往返六十里遞轉遞接得三萬人而累累之料糧固不脛而馳也安在撥運之不可行乎淮海若鼓浪之候運道險惡可就天津糴于商令其自販自鬻利之所在皆爲諸有文遼陽穀價騰踊商無不爭赴者重價收糴自可濟用正不須連運耳

往行

清軍

前言

楊公士奇曰通變宜民之道于軍伍補役之事尤爲切要者亦惟遠近適宜而已竊見今御史清軍有以陝西山西山東北直隸之人起解南方極邊補伍者有以兩廣四川貴州雲南江西福建湖廣浙江南直隸之人起解北方極邊補役者彼此不服水土南方之人死于寒凍北方之人死于瘴癘且其衛所相去本鄉或萬里或七八千里路遠艱難盤纏不接逃死者多到衛者少長解之人往往被累非但獲罪亦有死于溝壑而不知者深爲可憫况今西北二邊急于防守而西北勇壯之人乃發南方在此固爲弗宜在彼且乏守備揆之事勢夫豈可哉伏覩太宗皇帝令旨北京人民有在各處充軍者今後勾補不復發去只就河間立一衛或一所就此當軍原衛軍伍別着人當若北京衛分當軍的不動宣德二年宣宗皇帝准兵部奏令雲南四川兩廣福建湖廣該勾軍丁除逃軍正身及已解軍丁外其餘留所在附近衛所帶管食糧操備本年十二月又准兵部奏今後一體存留收操緣海北地方的也就留在那裏衛所操備宣德三年又准兵部奏江西貴州等布政司軍丁

該解遼東甘肅等處并山西等布政司軍丁該解雲南兩廣等處動經  
萬里及七八千里者皆照例留在附近衛所帶管收操當軍又奉聖旨  
腹裏地方該勾的軍離原衛二千里以裏的發去二千里以外的都留  
在附近衛所收操此皆祖宗成憲蓋洪武中有犯死者恩宥免死不分  
南北發邊遠充軍所以懲治有罪此太祖皇帝之仁也其後有罪者已  
死補役者皆非犯罪之人朝廷憫其遠道艱難留于附近衛所操備此  
太宗宣皇帝之仁也今陛下卽位以來以陝西該解腹裏山東河南大  
寧都司等處衛所軍丁俱收發陝西靖虜衛又以廣西缺軍命南方貴  
州雲南廣東廣西四處該勾遼東等處軍丁悉發廣西都司屬衛收操  
亦是仰體祖宗之仁也近來該部執稱原舊隊伍難以改撥此只是畏  
避文案繁勞而不思兵備之無實不念下人之艱苦夫豈體國憂民之  
意哉近日兵部雖因清軍御史之言奏請清出軍丁暫發附近衛所帶  
管收操緣南北俱有邊境今俱少軍若只于本處附近收用近邊衛分  
緩急亦不得濟臣等愚見今所急缺邊軍欲行起撥者除逃軍外以山

東山西河南陝西北直隸今後清出軍丁各就所近發甘肅寧夏延安大同宣府永平遼東等處補伍雲南兩廣貴州四川湖廣江西福建浙江南直隸今後清出軍丁各就所近發四川雲南貴州兩廣極邊衛所補伍皆就定其衛所發去待補其有缺之後復有清出者卽于腹裏衛分補伍如此則兵備有實下人不困而國家急務亦無不宜矣

弘治元年馬文升疏曰太祖高皇帝創制之初設衛籍矣天下之軍共有數百餘萬卽今百有餘年而逃亡死絕過半蓋由里老埋沒而無冊籍之可查衛所作弊而無文卷之可憑雖有清軍御史而清出者百無二三雖解到衛所隨逃者十常八九若再放弛絕故愈多此軍士消耗之弊如此也其現存之軍在江南者俱各守邊備倭僎運糧儲在江北者俱京邊輪班操練而在衛守城不過老幼數百人都司操練止有餘丁一二千名居重馭輕京師軍士雖有二十餘萬南京官軍雖有五萬之上然多有名無實况騎射之未精什物之未備加以連年做工疲困已極輪班往返艱難尤甚此軍士見存之弊如此也消耗之軍旣不能

復見在之人又不堪用兵戎誠爲不足遇警將何調用況今胡虜猖獗於甘涼出沒于西北強賊又哨聚于江右此皆腹心之患而大有可憂者乞勅兵部通行天下都布二司各行所屬衛所州縣有司將所管各里軍戶充軍衛所官旗姓名逐一查理明白衛所各將所管軍人姓名籍貫充軍來歷年月審勘無差各備造文冊江南者送南京兵部江北者送在京兵部各將洪武以來舊冊查對如有差訛即便改正仍舊備照務要查勘明白除年遠盡絕外將宣德以後逃故之數每省各抄謄一本該部照例通行各清軍御史嚴督所屬用心清理不許視常虛應故事庶奸詐之徒不敢作弊埋沒其京營官軍候營造憲宗皇帝山陵畢日乞勅兵部徑自具奏請命本部堂上官一員會同各營總兵官見操軍馬逐一清理先儘團營務足營額之數其南京各營官軍乞勅南京內外守備官員會同南京兵部堂上官一體清查仍各禁約管軍官員不許私占役使及擅撥做工等項致累逃亡候清查完日各另回奏仍造冊送兵部查考其見在軍士務要着實操練精其騎射養其銳氣

一遇征調俾克成功如此則兵戎不致消耗而戰守爲有備矣

正德十四年王公瓊曰天下都司衛所每歲差去勾軍官旗不下一萬六七千名計其所勾之軍百無一二到衛有自洪武永樂年間差出到今三十餘年在外娶妻生子住成家業通同軍戶窩藏不回本部屢奏前弊蒙勅各布政司按察司并巡按監察御史挨捉奏報然勾軍官旗多有懷姦挾詐往往東潛西躲以致姦弊不除官府被其攪擾百姓罹其苦害徒有勾軍虛名而無補伍實効已經會議奏准令在京在外都司衛所不許填給勘合差人勾軍止將遞年逃故等項軍丁生名貫址造冊送部轉發清勾合用監察御史十七員分定地方清理宣德十年十一月二十二日本部官奏節該奉英宗皇帝聖旨是但近年水旱飢荒百姓逃移還未盡復業待明年秋成後着去欽此已經通行天下都司衛所并浙江等布政司直隸府州欽遵去後今照天下都司衛所將遞年逃故等項軍士數多遇警調用不敷今內外衛所將該勾逃故軍名貫址造冊陸續到部卽日秋成欲照先今欽依事理將原差清軍監

察御史陳穀等分定地方請勅前去着落各布政司按察司直隸府州各委官一員分投嚴督所屬州縣將冊內坐去軍人照名勾軍補伍庶爲允當今將清軍合行事宜欲便備榜就令監察御史齎去通行曉諭禁約未敢擅便開坐內一件清理軍政監察御史每歲八月終照巡撫官事例具清解過軍數回京正統元年八月十二日本部尙書王驥等于奉天門奏奉英宗皇帝聖旨是者府州縣今年有災傷人民缺食處宜加優恤待來年秋成後整理不許急迫重有擾害欽此又查得該兵科左給事中郭鏜等奏內一款清理軍伍開稱先該兵部尙書項忠等奏差御史一十一員前往江西等處清理軍戶三年一次更換清理方今水旱災傷無處無之若又照舊清理不過逼民逃竄耳如蒙乞敕兵部計議查照災傷去處照依往年事例暫且停清等因奏奉憲宗皇帝聖旨該衙門看了來說欽此該本部看得所奏要將災傷去處照依往年事例暫且停清若有先前清出軍丁亦要存留待候豐年解發另行查勘奏請定奪等因成化十三年十月初二日具題該節奉憲宗皇帝



聖旨准擬欽此又查得爲照例停免清軍官員以蘇民困事該本部議得各處地方見今盜賊充斥災傷重大各該清軍御史合暫停免本部欲咨都察院將山東河南江西湖廣四川福建浙江并北直隸順天保直等處南直隸蘇松等處各清軍御史暫取回京其見今該清軍士并各府州縣清軍官候盜賊寧息地方收成起解地方可保無虞等因正德六年三月十二日具題本月十三日奉聖旨是欽此又查得爲地方災異事該本部題該巡撫雲南右副都御史洪遠奏稱雲南地方夷寇搶刦村屯拒殺官兵本省遞年該勾軍士多係夷羅清查起解比之別省十無二三將本省清軍御史暫且取回又該巡撫貴州地方右副都御史蕭紳奏稱貴州地方苗賊作亂連年調征屢歲旱荒缺食貧難况貴州二十衛所俱充發軍人比之雲南軍數尤少軍政清理相應暫停將雲貴清軍御史暫且收回等因該本部議得所奏俱應俯從雲貴清軍御史暫取回京該清軍伍着落布按二司并各府州縣清軍官員清查起解正德十年三月十七日具題本月十九日奉聖旨是欽此通行

欽遵外今查得宣德十年原擬差御史十七員每年八月終照巡撫官事例具清過軍數回京後正差一十四員內兩廣雲貴共二員南直隸二員北直隸一員見今湖廣雲貴陝西四川監察御史四員俱取回停止又查得福建實有軍士九千四川七千湖廣五千陝西廣東各二千名江西一千廣西八百雲南七百貴州五十餘名南直隸府分各不及萬北直隸保定等七府并順天府共實有軍士七千餘名前項各司府實有軍人數內在逃該勾軍人其數又少臣等議得前項本部節年奏行清軍事例固是充實軍伍之意但自宣德十年以來朝廷慮清勾太急逼迫逃移初奏差官之時卽令待秋成方去後因災傷用兵屢爲停止又因兩廣雲貴軍少俱二省併差一官無非欲休息小民保固邦本之意及初議差官每年八月照巡撫官事例具清過軍數回京其後方議三年更換亦非舊例今查福建四川陝西廣東江西湖廣六處并南北直隸各府實有軍士各不過數千廣西雲南貴州三處實有軍士不過百十內有逃亡所當清勾者責之司府官員自可辦理似不必專差

御史一員督理雖稱雲南兩廣各共差一員但地方廣闊豈能遍歷況今蘇松淮揚等處災傷極重并其餘無災地方催徵起運京邊稅糧及派辦營造等項工匠物料比常繁重民不聊生當此之時若不從寬撫恤逼迫逃竄關係匪輕合無將湖廣四川陝西福建江西兩廣雲貴南北直隸軍少去處今後不必差除湖廣四川陝西雲貴見已停止外其餘取回俱京其該清軍伍聽本部查照軍政條例嚴督司府等官照舊清勾及聽巡按御史按察司分巡官遵照憲綱糾察查理惟浙江山東山西河南四處軍數頗多照舊各差御史一員清理務將應繼之人勾補軍伍不許將見在應役者妄解戶丁查理及將遠年丁盡戶絕者一概勾擾取足分數逼民逃竄及照正統元年本部原擬清軍御史每年八月終回京今合照巡按巡鹽巡關等項監察御史出差事例扣滿一年差官更代正德十四年二月十七日具題奉聖旨是欽此

嘉靖十一年王公憲曰清理軍伍係國家重事國初各該衛所軍伍有缺俱得徑自差人勾補宣德十年該本部題奉准事例各衛所將節年

該勾逃故軍士盡數查出分別司府攢造底冊一樣二本一本留部存照一本轉發各司府照名清勾每年將各衛所軍額攢造舊管新收開除實在清勾五項花名冊一本送部以備冒清漏清等項查照各司府亦每年將奉部到本部轉發清勾軍冊逐一開列前件攢造實有故事文冊送部回答立法亦若周詳但查得在京各衛所歲造前項文冊名數多者則費銀數十兩其少者亦不下六七兩又有各衙門歲該造送文冊不止一二十項每項費用不相上下俱于百戶俸給官軍月糧扣支使用極是煩擾不堪則在外可知矣况各衛每年清勾軍士多或數千少或千餘而計所解到軍丁每年多者不過二三十名至有一軍勾及數十次所費不知幾何而卒不能得其一曰之役者實爲未便各該承委攢造軍政指揮不免責成各所千百戶人等多有不通行查理但照前冊歲以爲常徒費少益非特視爲故事抑且或生厭心往往止憑識字人等任意磨寫唯求塞責大抵攢造次數愈多則差訛愈甚且奸弊橫出或以見軍伍而作缺有丁而作無以希解補取利者或故逃以

待勾既勾而復首以希解補取利者或有移居換籍以希解到作無憑收伍取利者或有新軍初到而勒財以逼之逃受賄以縱之逃以致隨解隨勾者雖禁例甚嚴而檢覈無法勢難悉杜及查各該司府每年奉到清勾文冊膳法各屬被里長書手人等增減字畫埋沒名數作弊多端其造送回答文冊雖多止是紙上虛文至有勾軍數十而實有不數人者又有一軍回答至十數次而卒無下落者又有雖稱實有而不卽解補者其已解軍丁則又隨到隨逃者有僞爲批印回銷者雖有近行衛填勘之例而道理展轉歲月侵尋冊籍浩繁日力不給終歸苟且又各清軍官員因本部原定三分之數或至不足有將不缺伍及在營有丁例不該勾人數作冊外清出以強奏免罪者有將丁盡戶絕責令里甲頂認及妄指無干者其爲民害不可勝言若不及今立爲簡要之法將見衛所之清勾徒費而行伍難充有司之回答雖煩而文具何裨且使奸軍或至計行平民或至枉及稽考既疎勸懲不至軍政之壞漸無紀極合行各該衛所自嘉靖十一年爲始除宣德四年以前逃故軍士

已經題准住勾外其宣德四年以後嘉靖十年以前該勾逃故軍士不必每年造冊發清聽本部定奪軍單式樣刻刷備將宣德十年以後嘉靖十年以前逃故軍士每軍一名用堅白厚紙填單一張用印鈐記隸本部者徑送隸都司者類送本部掛號轉發各司府州縣照名清勾仍照舊以司府州縣相屬攢造底冊一本送部存照以後年分止將本年逃故軍士造冊填單送部施行已發單者俱免再造本部仍每年終將各州縣逃故軍士單總數類填勘合催勾其五項冊亦不必每年造送聽本部斟酌定與式樣更名軍總冊行令各項該衛原設五所或十所俱每所釘作一本照依發去冊式分付百戶將各軍照充發年月順序挨寫不許遺漏每紙一張分作八格填寫一戶上列橫格開寫軍祖姓名籍貫下分八行開寫充調接補頂替來歷先管百戶總小旗姓名餘行空下仍于每百戶下除原額軍役填滿外及空格紙六張一樣二本一本送部一本存衛仍照前冊分別各布政司及直隸府州縣各造一本以憑轉發收貯以後年分止將本年新收編發軍由及解捕到軍數

開造送部本部清軍委官督令該管人員將該年逃故解到等項填註原單格下新充軍由填註該管百戶空餘格內該衛并各司府州縣亦行照式填註以備查照雖至百年可免更造各該司府州縣亦不必每年通將逃故軍士造冊回答及不許將未奉單勾者妄勾擾民止照本部發去軍單逐一清審內有丁者卽與解送着伍遇例優免及免勾者卽與開豁每年終將各解過軍丁收有批迴及例免者開造小冊連原單類送布政司及直隸該管府州差的當人員送部銷照若有勾軍丁自單到日爲始三年以上不解者雖止一名府州縣清軍官俱參問丁盡戶絕并山後人民挨無者查照軍政條例及節年題准事例經勘五次以上送清軍御史處審實類繳免其再勾本部及該司府州縣仍各立住勾冊每衛一本以備查照老幼不堪解者候經勘三次以上造小冊送部案候原單留該州縣候出幼解衛及老疾故絕日繳逃移跟捉者候三年不獲該州縣另冊編記原單繳部行該衛所另給單清勾如再三年勾取不獲仍照此例施行雖久不廢其該年清審過官員職名

及里甲鄰佑姓名俱照式填寫單後各取親押若里甲人等通同作弊將有丁捏作故絕壯丁捏作幼小非老疾捏作老疾見在捏作逃移者事發應解軍丁照例發邊遠充軍如原係邊遠發烟瘴極邊仍令僉戶下一丁補伍里甲鄰佑窩家人等各照例發附近充軍官吏依律治罪以後清軍御史定例五年一差務將五內發去軍單責令各清軍官逐一完銷仍弔各司府原收住勾冊查審內有捏弊另冊送部事完卽許復命不必定以三年爲限各清軍官員但以完銷軍單明白無弊及不枉平民爲賢否以示勸懲其各衛所及有司送冊單繳冊單限期并違限等項俱照舊例施行則清勾之在衛所者嘉靖十年若猶未損于舊而自嘉靖十一年以後各衛所造冊之費不啻減十之一所省官軍扣糧之害不知凡幾千萬矣回答之在有司者若嘉靖十年若猶爲煩而自本年軍單旣銷之後所嗣發者歲各無幾所省官司里甲之擾不知幾何而費亦不知凡省幾千萬矣且此單一出不可妄銷而不解之例旣嚴捏故之罰尤重住勾之冊尙存御史之查不廢則軍衛之該勾者



有丁在所必解無丁在所必豁雖欲以虛文了事不可得雖欲以刻薄  
用事不可得而行伍可漸充無辜可免害矣軍總冊之立可以俟百年  
不改而勾單之發又不煩複而易查非獨可杜展轉訛寫之端而在衛  
所妄勾之宿弊在各司府州縣吏書積年弄法之宿弊雖欲自逞其路  
無由矣軍之逃至三次者指揮千百戶之所管逃至若干名以上者凡  
法例之所欲禁皆可一揭以知而法行無不可救之嘆矣夫然後清軍  
之職在武庫者冊籍不至于填委故綜覈可精在有司者承行不患于  
煩難故心力可盡在御史者按治不煩于無憑故激揚有道庶乎簡以  
知要不病于迂疎變以宜時不謂之紛更而于軍政可少裨矣及照各  
衛所先年造到清勾軍冊舊例具新選官并覆任官員順帶水路應付  
紅船陸路應付脚力近該本部題准止許進表官及撫按等處公差順  
帶亦照例水路應付船隻陸路應付脚力但各衛所道里遠近不一前  
冊不肯一一依期到部每與進表官員到京相同各撫按等處公差人  
員往往利于刻文討馬不肯帶冊討驢又南北直隸各不係衝要府分

俱無人肯枉道賚送以致多滯今既定每軍止許給單一次則文移自減合咨吏部于新陞除官員係兩司以下州縣正官以上每季于各布政司選委一人開送過部將該地方軍單盡數給與順帶前去浙江等處送各布政司交割轉發直隸送各巡按御史處交割轉發照例不支廩給水陸應付紅船一隻陸路應付本官馬匹及量單多少定與扛抬人夫幾名本部仍按季另填勘合行各司府州縣查驗則驛遞既可干擾而軍伍亦得及時清理矣再照前項清軍事宜于各軍衛有司等衙門雖極簡便而該司稽考填寫各項文冊則實係天下軍政根本尤宜精詳所據原該當該吏十名內止二名係揀撥餘俱大撥多有不諳書寫恐致悞事各咨吏部將該司冊科令典名缺俱揀撥前來庶便益于事

楊廉曰祖宗舊例藏冊後湖法禁重不許諸人窺伺其深謀遠慮固非一端至于今日各處遠年之冊多而軍民戶籍大勢不敢紊亂者誠懼冊籍之獨全于後湖也今日一旦令其抄謄使人測知後湖之虛實則

戶籍之紊亂將有不可勝言者矣何者使後湖之冊全則抄之猶可惟是見今如永樂年間已不全十之一二如洪武年間之冊已不全十之四五如此而暴之天下使人知某里某鄉之無冊則向之所懼者至是有不足懼矣將見以民爲軍者得以肆其告訐而脫軍作民者往往遂其奸計百年之籍由此紛然而不定矣所謂意外之患者此也至若人之脫軍作民者其名字實是改換其都圖多是飛出若止據軍戶執以清軍曰某人汝祖也彼將曰我自有祖名字不同也某籍汝籍也彼將曰我自有籍軍民不同也若是果何以辨之辨之之術須從其民戶而查之假如其人之先誠于洪武二十四年脫軍則二十四年戶爲新立矣誠于永樂元年脫軍則元年戶爲新立矣而又查其田糧自何而推收則或軍或民斷不失矣今若止抄黃冊軍籍果將何所憑而以爲清軍哉所謂無益者是也果見抄冊之爲無益而決有所害則斷然止之不許費紙筆而別生事端也戶部尚書葉琪等覆題准其所言本部行移南京戶部轉行管冊官員今後後湖廣黃冊不許將概府縣全冊查

卷之六十四

清軍

十七

抄果有一戶二戶軍民冊籍不明解人前來挨查者止許抄查本戶田糧軍民丁產來歷明白即便發回亦不許因而帶抄別戶以泄事機如此則奸弊無從而生戶籍自然不亂矣

吳時來曰各邊軍士逃亡其實不及舊額之半今委官查點名數俱在而實則亡何也蓋公畏律條之重而私冒支糧之利也查大明律親管頭目不行用心鈴束致有軍在逃小旗名下逃去五名者降充軍人總旗名下逃去二十五名者降充小旗百戶名下逃去一十名減俸一石遞減至逃去五十名追奪降充總旗以是各親管官不敢開逃逃愈多愈不敢報今宜委兵部司官一員往核其實寬其文法令其在逃者從實開報如有私自頂替支糧者許填脚色明著頂補令各親管官收管著伍如有智謀出衆膂力過人及立有戰功照格陞賞此不召募之召募也至于總兵而下各以官之大小各占役使刺繡雕鏤攻金治木因而收其班直冒其月賞而家頗饒資與善興滅之流則假以美差其實在營對敵者每十之六七類皆老懦飢寒之夫人無贏糧馬非宿飽如

之何其能破虜也今宜一并蒐補凡強壯殷實之人選爲先鋒盡配以馬此強邊足伍之策所當併議者也

王世貞曰國家創衛所餘二百年雖遣發頻仍而死竄接踵以故藩臬郡縣清理俱有專官而時委憲臣督察勾補良亦專且重矣然而天下之衛所卒不充而民日以廢者何也臣自中歲跼伏田里數從父老遊處頗得其詳大抵所得其甚困而無益者莫過于遠戍遠戍之困十四在軍而十六在民臣每見清軍之牘一下其在窮邊遠裔戶弱丁單者一遇勾攝卽就拘攣沿門乞哀搏賴求助若旗丁稍衆者卽以不正戶應役或脅委孱弱或購推黠壯孱弱之人往往不達戍所就斃道路卽幸而達戍所而衣食鮮繼水土未服不窘而鰥則老而獨安望其能披堅執銳以禦侮一方瓜隄枝繁以長足行伍哉至于應勾之徒稍過壯黠籍口亡命詐索親鄰故隱行裝坐食鮮件着伍未幾或營稱齎冊或委托取裝衛官受其賄囑利彼月糧甚有解者未及門而軍旣高臥于家矣至于每軍一名僉里役二名押解此輩非有腴田上資應出踐更

者也又非身犯罪謫應流置者也使之費廬產鬻子女觸冒寒暑凌歷瘴險以與軍共一旦之命蓋至于千里之外而下產半廢矣二千里之外而下產盡廢矣臣故曰天下之衛所卒不充而民日以賸者此也其便莫若從近改補夫從近改補者大約仍以天下之兵補天下之伍而伍不缺也所謂便者有四應勾之戶樂于近而不預規匿使吏胥得計一也應補伍者便于水土而不致困絕二也近則不逃逃亦易跡三也解戶不致破家四也有是四便而二百年莫有以是請者有三疑曰兵制也曰罪人之後也曰邊衛缺伍也今中外衛所官犯私罪則調衛軍犯逃則調衛蓋不必拘原衛也遇故絕則銷不必足原數也今其調衛者後人耳而伍不缺故于兵制無礙也其言罪人之後者不知當高皇帝時多掾充乃從征二端耳而所謂罪者或糧賦違限或工作悞式甚而至于洪水之際奏請小有不合僚屬偶爾不知又甚而死事逮于羣從誣誤累及親友縱其身罪合而今之應補者日以遠也又况未必其眞爲之後者也至于邊衛之缺伍固所當慮第不知百年以來能與虜

戰而得一階半級之勳者有一清勾之卒否也揚粵之性不耐窮寒秦越見行如往棄市中土之不堪邊戍蓋自古記之若其邊地之近者不改而內固可改而邊也臣常與清軍御史李頤言之深以爲然特以身被專寄官應執法不敢以是請而臣請之也如蒙勅下兵部查□果臣言不謬通行各處清軍御史并查本省衛所旗軍缺籍其有遞遠省分應勾解者卽于百里內外派補充伍仍行原衛所註銷其嘉靖元年以後犯該邊衛烟瘴地面軍罪者不在補近事內以杜奸惡僥倖之端若應解遠地戶役責令有司量僉殷庶寬議津貼毋使無辜之民北閭受困仍嚴逃伍之條枷號調遠申縱放之法一體究治庶幾軍伍益實民困少蘇臣竊追一夫不獲之耻仰冀罰弗及嗣之仁不勝惓惓

西園聞見錄卷之六十五目錄 外編

兵部十四

邊軍

前言

丘濬

李東陽

魏時亮

丘璉

曹璘

吳時來 二期

往行

楊秉義

班軍

前言

商輅

李承勛

馬文升

胡松

何洛書

侯恂

往行 四

軍伍



卷之六十五

前言

魏時亮

往行 關

衛所

前言

丘濬

胡世寧 二期

往行 關

屯戍

前言

丘濬

李傑

劉天和

李承勛

倪岳

趙伸

附兵部議奏

往行 關

墩堡

前言

錢梗

往行

徵調

前言

胡世寧

倪岳

往行

西園聞見錄卷之六十五

外編

嶺南 張 萱子孟奇甫 輯

兵部十四

邊軍

前言

丘公濬曰漢人疆場之間既已廣屯增戍列營置塢而國有征伐又藉京師之兵夫內地有寇可出京師兵以平之若夫邊圉之寇必須用其邊兵何則蓋邊兵生長邊陲慣于戰鬪知虜人之情狀識道路之迂直且復屢經戰陣目熱心定若京畿之兵則驕奢脆懦目所未嘗見身所未嘗經况受命而總兵者皆天子之勳貴報効而從征者皆是權貴富豪子弟欲希功以得官耳非實有材勇欲敵所懷以建功業也一至邊城已既不能戰反役使邊兵之善鬪者爲之給薪水供草料及至虜退而論功方且虛張功次奪邊兵之鹵獲攘其首級以爲己功是以邊城

一聞京軍之來無不解體者爲今之計緣邊一帶分定疆界專責邊將守禦不得已而出京軍止用以爲邊城之聲援如大同則于應州或渾源州立一大營宣府則于懷來或保安立一大營其他遼東甘肅諸處皆然虜少入寇則各邊自爲守戰虜大入寇方許奏請京軍如虜寇大同京軍則于應州駐劄虜寇宣府京軍則于懷來駐劄兵法先聲後實每調一千則稱五千用以爲邊城之聲援非其力果不能支而京軍不得貪功冒進如此則各邊將卒畏京軍之擾害且奪其功無不奮志効死矣

李東陽曰聞有獻計者託言京軍不習戰陣欲調宣府邊軍三千入衛京師而以京軍兌數成邊每歲春秋番換如班操例臣惟京邊官軍各有分地必有急事乃可互相應援今無事而動一不便也京軍備邊不習戰陣難保必勝恐損國威二不便也京軍出京駭人耳目傳聞各處未免驚疑三不便也京軍出外倚恃強勢占住房屋索要錢物需索酒食強買貨物姦污婦女將官護短而不肯禁邊方受用而不敢言四不

便也邊軍在內狎恩恃愛傲睨軍民蔑視官府小則怠玩大則違法治之則或不能堪縱之則愈不可制五不便也遠遠鄉井拋棄骨肉或風氣寒煖之不相宜或盤費供給之不相續六不便也糧草之外必用行糧布花之外必須賞賚非緊急不得已之時爲糜費無已極之計七不便也往來交替無有寧息倉卒之際或變起于道途厭倦之餘或患生于肘腋八不便也示營之空虛見國中之單弱九不便也西北諸邊見報聲息唇齒之地正須策應脫有疎失咎將誰歸十不便也凡此一事不便有此數端今五府以爲不便臣等以腹心之臣居輔導之地若阿諛委順勉強曲從是滿朝之臣皆有爲國之心而臣等獨當誤國之罪萬死不能以塞責矣

魏時亮曰所謂憂邊者夫邊卒之苦極矣苛索等弊已略言之工役諸困尤難枚悉他如足屯額則扣月糧備買馬則追朋舍撫窮夷則減哨糧果難全免並量宜優恤迺若宣府極苦于領買夷馬大同極苦于補買倒馬無非爲市本計愚謂市本湊給別須計處計倘無措懇請增給

勿以累軍凡變賣夷馬只照時估一有倒死只追肉臟此積苦之量宜優恤者也迺若修工務修其應守者痛省其可已者糧料務以時給散遇貴卽稍增折色無非痛念窮邊計加優恤之意夫軍伍實則士衆如林而選練可足邊卒優則士有生氣而選練可精勇銳之勢漸張敵氣之威自奪矣

丘樞曰巧猾之弊何處無之其在邊方則爲尤甚蓋疆場之外防禦爲急刷滌弗遑姑息爲多而法網易弛且恐招怨生謗故皆熟視而莫之問耳卽如邊士之擅殺降夷也豈不沮歸附之心歟軍之私易虜貨也每至啓窺覷之釁剷除糧餉可憐寒餒之悅巾擻奪首功不免英雄之喪氣盜賣以及虛出則廉庾爲虛役占而又買閑則名籍徒具軍地有清查之名矣豪強占據而莫敢誰何屯糧有徵收之數矣官吏侵漁而無從對照其他百孔千穴蓋更僕未易數也宜許新任總督鎮巡等官盡將官府及地方中累年宿弊次第剷革無分官民豪右但一有沮撓聽指名奏聞以憑究治昔人有言興一利不如除一害正此之謂矣

曹璘曰聞甘涼以及大同宣府西北一帶胡馬乘生邊報日至虜情詭詐佯言進貢實覘中國其小王子叱甲思蘭哈密朵顏等路連絡屢續緣邊綿亘數千餘里萬一唇齒相依犄角爲寇禍害非小誠可深憂若不早爲之計臣恐臨時噬臍無及臣聞隣近軍民慣見達賊形狀亦習知所爲心胆旣大必無退怯乞勅邊方鎮巡等官清查彼處舍人餘丁揀選精壯者給與馬匹糧料及器械雜物民間子弟願投充者一如舍餘處置仍厚加賞犒務使所得平居編爲什伍隨操有警則令其臨陣對敵有功之日依例陞賞未有不濟事者今之議者動調官軍殊不知勞師費糧經過騷擾軍衛有司旣困于送迎又苦于誅求爲害百端何可勝言臣愚以爲以勞師之費而賞邊軍何所不厚以送迎之力而運糧儲何所不給又况京營軍馬素不習戰軍畏其聲勢而不敢前馬嫌其氣息而不敢進以此觀之不如招募邊人給與馬匹等項以時計日漸入自然萬一醜虜入寇不得已而興征討之師京營止宜挑選精猛官軍令老練軍官統之以往策應庶幾便

吳時來曰夫練土著莫若先練邊軍當事者輒稱無可練愚以爲非無兵也兵不聚也乃不得其所以分合之勢也何者兵有聚而爲正亦有分而爲奇茲其分也未嘗不可聚其聚也未嘗不可分大都兵家之勝不可先傳計利以聽乃爲之勢以佐其外若卒雜而不集兵合而不齊名曰自弱犯兵家大忌矣國家備邊東起遼陽西至甘肅十鎮官兵不減百萬今雖虛耗尚有六十餘萬若聚此六十萬衆訓練三年直犂虜庭搗其巢穴虜寧能我禦哉緣此六十餘萬者散在九邊以一鎮言止五六萬有奇則此六十萬衆之大勢十分之矣又一鎮之中總督標下一枝若干名總兵副總兵參遊各分一枝若干名又巡撫兵備各分一枝若干名近據總督都御史劉燾開稱該鎮在邊食糧軍六萬關城營寨三百餘處總副參遊提調官不下百員一應防守坐墩哨報俱此六萬之衆則此六萬衆之大勢又零分之矣勢分而不聚則雖以六十萬衆全付一鎮暴師費財無所用之何也素所不教之人分數不明先後不相及衆寡不相恃貴賤不相牧雖有兵與無兵同故海防之弊莫敝



于擺海邊防之壞莫壞于擺邊今擺邊密矣賊每由邊入不亦崇虛文而招實禍乎且各官既各分兵而該鎮之兵其強壯者必先盡總督次巡撫次總兵次參遊是督撫哨下兵必精壯有不過擁以自守而參遊衝鋒殺賊之兵又皆三選之餘斯非以我下騎當敵上騎者乎愚以爲每一鎮宜合一鎮所轄之兵聚爲一處擇一總兵官久而任之聚而教之教以車戰步戰騎戰三法爲督撫者不許擁兵一枝臨時量留兵百名自衛其見在標下兵盡發營中操演其哨守探報則就營中輪番差遣務使上有必勝之將下有無敵之兵教之三年或五年于是連此十鎮之兵聲爲擣巢之計待賊之來以戰爲主令其大挫深懲不敢側目南視斯策之上也兵力既聚訓練既成士卒不用命主將不成功則總兵不善操練之過宜伏其辜如是而邊防不飭者未之有也

吳時來曰夫入衛乃先年權宜之計耳後卒以爲常遠赴千里之外動經踰年之久人馬俱敝無有息期是自撤藩籬而縱寇入門也從古禦戎非求其勝在制之而已制之于術莫如強邊今不制之于外待其深

入而欲補塞罅漏列置于平原易野之間勢必不格愚以爲門庭不可不守而藩籬決不可撤卽如牆子嶺馬蘭峪太平寨等處各見有入衛兵一枝今秋胡馬南突不聞一濟何者財匱于兵衆力分于將多奔命爲疲讒怨易生無益于用不若去之非輕內地之捍禦正所以厚邊鄙之藩籬也至于各路防守則總督劉燾所開石門寨舊有遊兵二千欲再募二千可罷遼東入衛兵一枝如燕河營將保定兵調守可罷固原入衛兵一枝如太平寨塞垣可恃且有總督標兵二枝可罷延綏入衛兵一枝如黃花鎮有總兵標二枝可罷寧夏入衛兵一枝夫陝西遼東皆稱孤援尙宜添兵增守安得復分其力燾自膺利害之寄言必不認其議似或可從如此則藩籬漸固虜深入密責諸鎮以乘虛搗巢乃制謀攻心之策所當併議也

往行

楊都諫秉義嘗奉命犒邊軍故事延慶步隊軍餘及鎮邊召募之衆賜皆不及而守禦白羊口堡諸軍以名隸涿鹿亦不與賜公至居庸奏其

勞詔賜白羊視居庸餘皆半給至宣府盡數滿丁奏補給銀二萬兩又奏發內帑戶部羨銀積粟居庸紫荆雁門等關爲戰守備邊人賴之

### 班軍

#### 前言

商輅曰大同宣府獨石馬營等處原操官軍在邊年久屢經戰陣自正統十四年達賊侵犯或有漫散赴京或因頭目帶領久已資緣偷安內地今宣府獨石等處多係各處所發并河南輪班官軍在彼操守此屬旣無室家可恃又無田地可耕因循度日懸望更替欲爲久遠之計難矣若復姑息因循聽令各官巧立遊擊等項名色占留在京不行發遣則邊境城池愈見空虛設有賊情將何備禦且京師聚衆百萬縱得此屬不見其多不過爲諸頭目營幹家事而已若邊城得此官軍可以壯威武禦賊寇使其成家業爲永遠之計其爲益孰大哉

李公承勛曰我朝官軍調操之制肇自永樂初年京師兵少調發中都大寧山東河南附近官軍輪班上操宣德正統以來踵爲故事日益加

密除南方各省未暇遽論外如河南山東南北直隸俱京師咽喉山西陝西又中原形勝要地各處官軍或調操于京師或調操于各邊本地無軍可守臣昔備員陝西右布政司經過潼關詢其實在軍士不過數名驚問其故始知皆在各邊操備後盜入商洛鎮巡官議欲赴救無軍可遣河南山東直隸武備單弱尤甚以故盜賊縱橫莫可禁禦劉六王鐸足爲前車之戒臣熟知前項調操官軍在京止堪備做工之役在邊則將領給私役而已供饋送而已于國有行糧料草之費于私有資送科剋之苦而又未嘗得其實用今昔相因以爲舊規而不敢變此軍旅之所以日耗而內地日益空虛者也如臣愚計省行糧以雇遊食何憂工役之乏以行糧而募土人何慮邊旅之寡通將調操官軍留于本處委官皆同民壯精加操練如隣有賊則互相策應又或一邊告急則合力赴援如此貧軍無侵剋之害地方得保障之功比之不問有警一概分派調操者強弱多寡之勢又不可同年而語此一弊革而數利興者也

馬文升曰中都留守司并山東都司撥去黃花鎮操守以四處論之已是不均者其中都留守司獨撥秋班山東都司獨撥春班以兩班論之又次不均既該軍人楊上三等合詞具告合無行移團營自弘治五年爲始先將河南都司春班大寧都司秋班輪赴該鎮操守一年至次年卻令大寧都司春班河南都司秋班又輪赴一年中都留守司并山東都司輪流赴鎮亦如此例大率四處每兩年一輪兩班俱遍周而復始永爲遵守又查得戶部等衙門會議都御史唐珣奏原派黃花鎮春秋兩班官軍要照京營限期徑赴黃花鎮交班照得前項官軍今後定撥省諭先擬事例兩年一輪先期一年預行定撥省諭領操官旗不必到營徑赴該鎮交班敢有該班來遲脫班不到及到班在外等項悉照京營事例而行又經通行欽遵今保國公朱永等奏稱弘治六年黃花鎮秋班官軍輪該河南都司摘撥一千五百員名前去備禦今止到六百五十三員名數內尙欠八百四十七員名數要乞查照神機營官軍守備紫荆關等處事例行五軍營照數撥本鎮備禦一節照得京營軍馬

永樂宣德等年在五三千神機三大營操練至景泰初年選出精壯官軍立爲十營操練專備征調天順初年仍散歸三大營至成化年間爲因各營軍馬號令不齊猝遇邊方有警方時取撥不定恐致誤事因言官之議于各營內選取在京并在外官軍共一十二萬總在一處分爲十二營操備又命內外大臣提督名爲團營凡遇各邊有警就便調遣前去不許別差蓋內以護衛宸居外以預防邊患居重馭輕強幹弱枝其慮不爲不遠其勢不爲不重但今團營官軍事故等項不及一十二萬之數而五營欠少團營官軍四千餘名卽今又爲別項工役或遇重大工程又于團營內借撥其黃花鎮防守官軍原係長陵等四衛撥去爲因離衛不遠卒多在逃又因閱實邊關大臣暫于團營內撥去今本鎮秋班官軍輪流該河南都司摘撥前去防守但河南地方水旱相仍官軍飢窘不能赴操以致團營數少欲俱到足撥去緣今正係防冬時月不無有誤本鎮備禦若再于團營內撥去萬一邊方有警又恐遣調不敷况團營官軍不宜別項差撥係奏准事例今旣該各官會奏前來

若不權宜處置未免兩相妨誤合無行移五軍總兵等官于本營次撥官軍內照數先行摘發一千五百員名差人送至黃花鎮操守仍預行中都留守司該春班各定官軍一千五百員名不必赴京徑赴黃花鎮防守遇而復始二年滿日仍令河南并大寧都司照前輪流免致撥亂團營官軍該補團營之數陸續補送庶京營武備以修而邊關防守不失矣

胡松曰故事山西河南兩省歲發吏卒數千人戍大同名班軍豈非以大同爲山西河南之門戶大同安則諸郡安故雖損內以益外而不暇恤邪然臣嘗竊伏聽于衆庶今其流弊已極不可不思所以變而通之也何者每班軍未行其統管把總若指揮率頭會而戶斂之市買其地之所有名曰土儀蓋自總兵而下至于守備數各有差及其到鎮曾不使之操執刀兵跋履行陳而乃撥送宗藩給役卿貴又否卽修濬墜隍斬艾草木軍旣不耐其水土加以糧餉不繼飲食不以其時往往疾病以死然亦月支行糧四斗有半在本軍則有廢棄家室之憂在大同則

無毫毛防禦之用在本鎮則無以爲守衛之資在客鎮則反以增耗盡之實大非所以使人而益國也請令大同鎮巡召募沿邊土著之人抵補兩省輪戍之卒之數彼戍卒所遺每月行糧足支務軍半月之食矣然後扣追二省歲輪戍行糧以補應募之人之食而又明厲科禁嚴立限期卽令領班指揮若把總管解交割勿使稽緩侮盜如此則應戍之士得以耕鑿貿易保其妻孥彼必不苦于供給大同失業之人得有所藉以自養必且欣然于赴召而山西河南兩鎮又得人以爲守是一舉而三得事半而功倍也比諸羈旅不常之人愁困無聊之士往來道路計日懷歸徒耗縣官之儲無益防禦之實者豈不大相遠哉

何洛書曰中都河南山東諸處京操班軍國家所以衛京師固根本至重務也但沿襲浸久玩愒滋生有不可不亟爲振飭者請以玩愒之弊言之各處春秋二班原有定額近年每遇上班下班亦多報完其實十不滿其八九而已大率由于領班官之包折而逃亡不充者亦間有之夫十旣不滿其八九而常多報完者何也蓋領班官之虛冒也如每歲



當起行時各該巡撫及都司官嘗點驗之矣則募人以充其數比至京也兵部及團營嘗點驗之矣又募人以充其數迨乎入營隨操巡視科道官嘗抽隊點驗之矣復募人以充其數或撥之工作其募人以充數者如故也諸非點驗非工作而問其實額何有焉夫若此者得追于罰不啻幸矣迺往往因而得獎且有濫薦剋者是使奸僞得計而核實之政不行也彼將何所懲乎况班軍之說本以居重馭輕無事則隨營操練有事則禦侮折衝今特以應文具而已豈祖宗立法意哉謂欲革此弊有二申法簡帥而已何謂申法請下巡撫兵備衛所官員□相責成務使踐更者必滿其額包折者莫容其奸而又稽以年貌防以互察嚴以虛冒之罪其行糧預支等錢至部卽委廉正官換官給散如冬衣布花例毋許都司及領班官得侵漁而扣減之此法之當申者也何爲簡帥夫領班之役衛官中有身家知自愛者多不願行而或以付諸無籍之輩欲責以無虛冒胡可得已自今宜慎選其人且令衛官必經領班効勤始畀以司篆余書之任若都司之統領者尤須精擇以充之苟衛

官一有包折都司一有扣剋卽加按治而易置之不徐徐焉庶乎人情知警而積習可釐此帥之當簡者也猶有說焉夫軍士至寒苦也赴班至勞役也乃徐察其情率不病于操練而惟病于工作蓋工作之事非官府則山陵往往中官參之彼不利于役之齊而恆利于工之折貧民糊口不給而復加以誅求方稱貸未已而子錢旋責其負焉卽欲不逃亡何待也領班官虛冒成習矣都司官卽欲不因循苟且何待也方今聖主在上紀綱肅清所未盡滌者獨有此耳更望宸斷有不得工作務勅巡視官嚴行稽察有敢若此者毋論中外必罪勿貸則官軍不敢重累而督責之法于是乎可勉矣

侯恂疏曰班軍之設以擁護神京祖宗兵制良有深意而承平沿習積弊已久上班下班祇存其名而無其實如職鄉歸德春秋班軍三千三百餘人赴京者十之一耳奸棍兜攬貪棄包占牢不復破點軍放糧但須數文顧覓之錢而事已畢矣國家亦何愛于烏有而任其漁蠹爲故曰折之便折一軍之屯地可得三兩折一軍之大糧可得八錢折一軍

之日糧可得二錢是一軍可得四兩有奇一衛二千餘軍可得萬兩有奇以一衛例各衛以秋班例春班約各都司之所領凡數萬人可得數十餘萬矣不費推算不費錢剔而多得數十萬餘不足爲持籌之一助乎如慮堂奧空虛倉猝有警防守無人曾見頽敵之衛卒能堪苛戈縱使赴京亦象人耳今後確宜盡折便以折解錢糧貯充召軍練兵之費此又兵餉之長計

往行

軍伍

前言

魏時亮曰夫軍不實尺籍徒存無與爲選又孰與爲練哉議者有謂實軍伍以召募者竊謂應募遊食之徒多別營亡命之卒易召冒餉旋補旋逃散則作姦聚則肆毒此必不可用者有謂實營伍以土著者訪得名爲土著實係亡命卽今漢莊陰陽之遺害可鑒也此等有缺痛禁私補嚴責各官州縣精察民莊之鄉夫市里之任俠補之願鄉夫任俠多

不願募要須歆以糧賞約以歸農給以不役占不勾補之執照將必有樂應者有謂實營伍以新軍者夫勾補解撥二軍初到最宜安插先須痛懲該管之見面書識之常例同伍之人幫優以分營樂土給以月糧妻糧授以閒田世業一年之後方可選其壯者編操次者工作弱者就近擺堡處之得所方可免逃亡之患耳迺若武官以軍逃爲市最宜重逃軍之罰重冒糧隱糧之禁重科索役占之罪總爲督倡者重加之意而虛伍之錮疾其有瘳乎若夫南兵須馭之以善將且重之以疑覺無事時與北軍一體更練有警處與北軍分搭調發暗結驍智者以安其心密除最肆者以攜其黨有缺必重禁隱匿不報重禁通同再補此處南兵以安營伍之大概也

往行

衛所

前言

丘公濬曰漢之材官踵秦而置唐之府兵沿隋而立宋人鑒五代之失

而萃兵京師然亦多因其舊本朝雖接元之後而未嘗因元之舊是何也元起朔漠兵制簡略不可爲法故也我祖宗得國之初在內設錦衣等上十二衛以衛宮禁設留守等四十八衛以衛京城上十二衛爲親軍指揮使司番上宿衛無所隸屬而京城之衛屬五軍都督府遇有征行則調發之今天下都指揮使司凡一十六處而爲行都司者四近又于湖廣添一行都司爲五焉內外衛凡若干處其所設軍士俱有定數大率以五千五百名爲一衛一千一百一十二名爲一千戶所一百一十二名爲一百戶所衛分軍數或有多寡而千百戶所統則一每一百戶內總旗二名小旗十名管領鈐束以成隊伍此則本朝軍伍之制也蓋前代之制多因勝國之舊或臨時制宜或因時救弊往往皆出有司之處置臣子之建請惟我聖祖久歷戎行洞燭古今之利病斷自宸衷制爲畫一之法可以經久遵行萬世無弊

胡世寧曰今天下衛所原額軍士逃絕者多實在者少以逃絕者言則遠年丁盡或埋沒者歲歲清查既無根影近日病故或逃亡者年年勾

解隨復逃回空累里甲造冊勞費貼解難艱或購買孤遺以作清出之戶丁或替娶貧婦以爲軍人之妻小甚者或因清軍而命斷于箠楚或因解軍而產破于盤費此民間清軍解軍極苦而無益者也至以見在者言則在衛軍士差占者多操備者少至論操軍又惟虛應故事教場虛設而金鼓不聞或金鼓雖聞而武藝不習甚或得財賣放掛名行伍身不在營故今養軍雖多能戰無幾在邊遇敵則嬰城固守而坐視鄉民之被掠在內有警則奏聞後遣而先累民壯之被傷此民間空出力以養軍而又代軍死甚可痛也至論役占之弊尤不忍言且如漕運京糧通論民間加耗脚米及衛所船料等項之費大約費米三石至京師而軍士之勞不計焉至運邊儲勞又不止是今每月糧米一石一軍支給而又加以馬匹草料投跟勢要買閒止納銀二三錢耳此以民間三四石米之費而止爲勢要賣二三錢天下若之何而不窮也且在昔充軍之戶或由垛集歸附未必皆是有罪何今貧絕而不免清勾在今充軍之人悉是奸豪巨惡未必皆是可矜何不數年而卽蒙赦宥因茲輕

重不均人愈玩法况今東南力薄之人充軍西北既不得用西北近邊之人充軍東南亦常逃回彼此無益理宜通處乞勅兵部會議選委兩京能臣分查各衛軍籍見在若干故絕若干其在先丁盡戶絕累經清報兵部者既免清勾以除民擾以後果有埋沒自首者即收本處被人首實者追解邊衛其見在者又分在衛住有家業者若干遞年若干其勾補者即係不肯復役緩急難倚之人合無此等軍士除在京及在邊衛分仍前勾補不動外其在南京并各處腹裏衛分者悉改編原籍衛分以免其逃然後以今改編并在衛原有家業者通等各衛實若干其有缺伍則另選軍餘舍餘願報食糧及犯罪例該充軍者補充之後再弗赦宥其見年五十以上該問充軍者即許子孫家人替當軍士在逃二次三次者悉依大明律科斷其情重人犯例該邊衛充軍者望體祖宗立法之嚴責賣家產房舍遷發使絕歸念其或一時難賣則令里甲鄉鄰各依鄉例認佃租課每歲除天荒及代納糧稅外其餘本處官司上納三年一次亦如軍裝類解該衛分給本軍以爲盤費庶使軍士在

卷之六十五  
衛皆有土著各畏法律而逃者少矣至于衛所管事之官猶望併省勢要役占之弊嚴加禁革于是分委將校教習武藝武藝既精一可當十而後教以團營走陣之法使知坐作進退之節如此則軍皆可用而民出力養之不爲虛矣

胡世寧曰新例軍職立功者許贖米五十石卽令還職只如指揮使一員立功五年則省給每月正俸實米共四百八十石餘俸新鈔共一千六百二十石今得其納米五十石而卽以與之所得少而所費多矣又如邊衛武職有犯該調外衛者彼多安土憚遷此等官生長邊方慣習邊事比之南方解北者不同宜令巡撫量罰邊糧若干或令降級或令減俸就彼差操免其調衛則可歲減月糧算亦不資臣嘗有言不行又如武職有該充軍身故者長子襲職支俸次子代罪充軍大是不均此等官亦合降襲免其充軍可省月糧先該給事中有言亦不用又如京衛官先年有從願改註外衛之例以軍政則外衛官多有不得官事者只當一軍之役今得改增外衛則可以多中揀擇而軍政得人矣以俸



給言則分衛易給而京儲難運有如調出指揮一員則每月省京儲米  
入石而可養壯士八人者今亦停阻不行臣謂此等事皆屬謬誤所宜  
去之

住行

屯戍

前言

丘公濬曰按自古建都者皆于四近之地立爲輔郡所以爲京師屏蔽  
也漢以京兆左馮翊右扶風爲三輔唐亦以華州同州鳳翔爲三輔而  
宋初未遑建立至于徽宗時亦于畿郡立爲四輔焉每輔則屯兵二萬  
人爲額我朝建國江南于鳳陽屯重兵凡京師軍皆散于江北滁和等  
處爲屯田雖不名輔而儼然有藩屏之意太宗皇帝自北平入正大統  
遂建都于此其初猶以行在爲名而立一行部以總之其後編立五府  
六部大小衙門如舊制凡京衛之兵皆分其半以來并起江南富民以  
實之而去其行在之名則是萬萬年不拔之基永定于此矣然而畿甸

之間猶未有輔郡蓋有待也臣按漢唐宋之輔郡皆因郡治而立今日之建置則以形勝要害爲固蓋漢唐都長安宋都汴梁皆去邊地遼遠非若我朝都燕則自以都城爲北邊捍蔽而北最近東次之西又次之而南爲最遠焉如漢唐宋故事立爲輔郡以宣府爲北輔因其舊而加以番守之軍俾守國之北門其東也以永平爲輔以守松亭一帶關隘及扼遼左要害其西也以易州或眞定爲輔以守紫荆一帶關隘其南則以臨清爲輔坐鎮臨河而總扼河南山東之衝又自此而南屯兵于徐州以通兩京之咽喉每處屯重兵一二萬量其輕重緩急以多寡其數罷兩直隸河南山東上京操備班軍因近屯守以爲京師之屏蔽遇京師有事則調發焉夫自古爲國者必固外以蔽內居重以馭輕譬則人之居家必有藩籬牆壁堂堂室堅固內呼而外應若設關捩然有所動于中而四面之機畢應之然後盜之利吾財者不敢輕侵犯焉近年以來起調兩直隸河南山東等軍赴京上班操備半年一替方其新班既起而舊班未回城池雖設而隊伍空缺幸而無事則已萬一有不逞之

徒乘虛爲亂將何以支持之倘立爲輔郡因近屯守則軍士遂室家之  
顧而生息日蕃國家省轉輸之勞而調發易集邊方足禦備之具而關  
隘有守如此則都城鞏固宗社奠安矣

李公傑曰嘗按漢元朔中取河南內地因河爲固唐張仁愿築受降三  
城渡河而軍雖有寇盜關隴不搖今也受降既廢內地亦虛自撤藩籬  
任虜出入由是延綏以至寧夏千餘里之間無非受敵之處雖曰屯戍  
相望然彼聚而攻我散而守欲以制虜不亦難乎如臣愚計縱未能北  
循受降據虜心腹亦須乘虜空虛遣兵搜括按漢遺規阻河而守雖極  
勞費于一時終獲安寧于悠久議者必曰自宋以來茲地久曠懸隔內  
郡應援實難然元朔之前此地不曠乎何以能立郡也漢唐以來不能  
守此乎何以不陷于虜也此誠要害之地其可失乎

劉公天和曰興武營之南八十里有鐵柱泉週廣百餘步套虜每至必  
飲馬駐牧數日而後出誠要害至切之地也前總制尙書秦紘嘗謂臨  
泉險堡但見狹小近亦頽廢無軍防守合將前堡增築寬廣高厚將全

保入堡內修葺營房并將小鹽池紅寺等堡增官軍量爲摘撥及于寧下五衛軍餘內添撥共足五百特設操官一員統領駐劄多給軍火器械防守其堡四週空閑肥沃地土又廣合委官撥給聽其儘力開墾三年之後方從輕起科卽准月糧臣復訪查附近迤東地名石溝池出鹽小池所產不多未經收課常年附近軍餘自取合聽前項新設堡軍收鹽食用如是則官軍饒裕城堡充實虜數百里無飲馬之水勢自難于深入矣工費甚微而爲益甚大

李承勛曰墩臺之設所以哨瞭虜賊動止爲邊方之耳目也近日各邊墩臺雖設有軍官徒有虛名實無濟事虜賊臨邊或因下墩取水或因當夜而寐者捉我墩軍問我虛實虜賊之來疾如鷹鷂故炮火未開而賊已遍川原矣近堡人口頭畜收斂不及多被殺虜滿載而歸由舊路而出邊方失事率多由此臣愚以爲虜賊之志在于搶掠而已若使傳報有節炮火分明遇有聲息各堡收斂人畜堅壁清野彼則四散刼掠一無所得則必攻堡而我亦有備人馬困憊空地而歸雖不與之戰而

彼之志亦隳矣所謂以逸待勞者此也

倪公岳曰昔虞詡之在武都日增兵灶示之以強李牧之在鴈門不事捕虜惟謹烽埃示之以怯兵家之算各有攸宜今延綏之地東起府谷孤山西抵鴈門保定不過二十五六寨而止寧下寨抵于靈州千戶所不過四五營而止遠者百有餘里近者亦不下七十里城郭驚遠居民星散屯兵雖有其地保衆亦非所賴况又二邊墩臺相離二三十里加之道路迂曲傳報不捷若今花馬池烽火必歷興武高樓轉往迤南萌城不下七八百里比及火至賊已出境是以人民在田牧畜遍野虜騎卒至一空無遺往往皆然可爲太息臣謂當閑暇之時相度居民之便或百十餘家則築一大城或五六十家則築一小堡城堡之中民乃自守少于此者徒以附焉更于空隙之地擇其險阻之宜或可如遼東立柵築牆以爲屏翰或可如大同宣府斬崖掘塹以爲陷穽至于墩臺亦宜增廣或使直取近或添置令密虜寇將至卽相傳報人畜之類輒收之堡堅壁清野使無所得且使虜心驚疑進退惶惑但見堡城聯絡詎

能窺我虛實人畜入堡既不遂剽掠之計城堡犄角又恐有邀截之虞如是而虜敢深入以爲邊患者未之有也

趙公伸曰固原地方廣衍平漫四通八達乃其總會如分嶺墩以至城兒山墩共一十三座直與環縣城相接自下馬房響石溝墩二十四座直與韋州相接自海刺都地方青峰臺墩以至尖山墩一十五座則又界乎鎮戎西安二路城堡要害之中自西安州山神水墩以至城邊等墩共墩九座直與靖虜衛乾鹽池相接先年炮火分明緩急有備數十年來大虜住套動以萬計大舉入寇動經千里固靖一帶彌滿山谷處處通賊各路炮火處處舉放安會靖隆雖得少寧而固原鎮戎先以動搖石鹽韋盟雖云有備而定邊興武一帶先以殘破宜令延寧鎮巡各將接連固靖一帶墩臺如或瞭望有警舉放火炮晝夜遠近之間務須絡驛傳報時無停刻復令固原左右見設守備領軍備將墩臺與每墩應用旗杆鎗炮盔甲弓箭烟筒火把等件與原選守墩墩軍爪探夜不收與巡墩識字官旗人員的數造冊選理完備或分各路或止照舊各

選指揮一員量帶官軍往來提點急切事宜從查處如守墩原係軍人  
五名今合擬增十名原保一班今合擬增兩班務使此去彼來均勻勞  
逸所謂爪空夜不收草行露宿日夜哨探事出不虞死于非命除本等  
賞賜應合照例管給銀兩優恤其家如瞭望不真以多爲寡虛張聲勢  
以寡爲多耽誤事機除本等罪名應作何處以警其餘大段各路火炮  
號會止固原警急相通忽如風雨若使焚柴舉火多寡錯雜利害相關  
候事多矣宜令兵備副使訪採衆議如賊人來自各邊拆牆入境或三  
五人至三五十人日則一齊舉烟夜則一齊舉火各一把隨即放炮一  
個燒柴堆一座或六七十人至百餘人日則一齊舉烟夜則一齊舉火  
各二把各隨卽放炮二個燒柴堆二座或二三百至千餘人日則一齊  
舉烟夜則一齊舉火各三把隨即放炮三個燒柴堆三座其或虜衆侵  
犯經時不退幾日不歸每日每時每夜每更悉照原擬各舉火二次直  
待出境乃止仍督調晝夜時常瞭望用心傳報然後腹裏城堡人馬操  
縱便爲進步止收斂人畜預得提備復將環蘭左右崖窩洞堡附近扼

塞飲馬水頭所就令原住官舍土遠土人各顧利害但有弓矢軍器置  
辦不備奏討太僕寺馬價銀願領馬者給與五兩不領者三兩所聽完  
備戎器從征編伍戰守有績並擬陞賞者人有言東南文苑而氣緩西  
北藝精而氣盈環蘭近塞之地固其所也召募之法宜卽在此而況天  
晴遠戍狼火分明將領轅門軍威素著者乎故曰忠者才之要權者功  
之機

兵部議曰南兵乘障正爲人非土著則臺堡卽其家業戍守卽其生涯  
故斥堠常謹虜之動靜時在目中久而漸非其初矣應如舊制名列南  
營者不許下臺應役仍用南將統之使將與兵習兵與虜習邊疆之上  
必有復覩親戚將軍之舊者至于俸將毋以鑽燭而希陞遷毋以震隣  
而謀更調毋以皮面而托逐廬人旣相習爲通融狡弁復多方爲營窟  
疆事之壞微獨蘇門爲然推意整刷不能不藉于塞上之當事者也

往行

墩堡



前言

錢公榘曰本兵初該邊警採合羣議令海內西北閭閻村落遍得築堡禦虜所以撫臣如法督促急如星火每州邑創堡數區制若城隍盈燕趙齊晉魯衛魏韓無不屹然創起窮二年民力制未得盡備而氣已索矣愚竊謂堡法可施于邊陲不可施于腹裏施于腹裏足以病民不足以禦戎足以致寇不足以忠國其說二十有五矣邊陲土廣民稀人驚得而俗尙首功地土曠本戎馬之地旦暮出入沸櫓彌逸得堡焉星羅其間矚敵之去瀾野耕作賊至倉猝亟有藏寓敵縱攻堡吾故暫支大軍瞬息可哨援敵或深入則羣堡後躡卒莫逞矣民稀則利曠土之饒相卹爲命視所寓堡不得不羽毛之惜人驚得則得堡爲穴養銳而息足焉隱然得其虎豹在山之勢發罔測矣俗尙有功則人自爲戰家自爲計不廛宮中之憂而彼可牙爪也此謂堡法可施于邊陲者也其四說如右何謂堡法不施于腹裏生齒之繁里巷散處之廣州邑城池聯絡之多法網牽制束縛之密夫生齒之繁則何地非肺腑易而盡待堡

園里巷散處之廣則備東遺西施之源釋實或攻虛之便民易得而置  
心州邑城池聯絡之多只如眞定一府地誠幾何三十二州邑棋布孔  
邇又每州邑贅數堡焉每堡如城之大而備其制勢或美矣法網牽制  
束縛之密只如眞定府每州邑儘民之力驅之守城驅之捍府又驅之  
戍西山隘口之險又驅之并力諸堡之中虛坐無警歲月之久此謂堡  
法不可施于腹裏其四說如右何謂足以病民其始工也拘集數十村  
民而築一村之堡則爾汝之嗟其就績也以數月積累之勞而或一旦  
傾圮剝落之易則復動衆之窘某憂後患也不難于築難于修不難于  
修難于守州城尚不易修不易守也而況于草率之堡乎其被程督也  
今日須丈尺若干明日又須丈尺若干今日造冊上府不如式之則駁  
明日上冊未備制又駁今日委官某促責明日委官某較量今日委官  
某檢正明日某覆核奔走文移之瀆吏人戴罪之嚴迎送夫馬之費動  
輒掣肘之艱民曷爲而不告病也耶此謂堡法足以病民其四說如右  
何謂不足以禦戎兵法守城之道有五敗一曰壯夫寡小弱衆二曰城

大而人少三曰糧寡而人衆四曰蓄財積于外五曰豪強不用命夫州  
選義勇民壯義兵而投之官搜窶夫羈之堡一不守也邊陲堡小室廬  
轉密人不必衆而力齊以專腹裏則不然二不守也攜糧當守堡之役  
人衆畢來則無室以居廢耕之餉可立而餒三不守也邊陲無堡外之  
家茲以外族遠趨化堡爲之守焉而其資產老弱則外懸此四不守也  
州城有司爲主之然而守非君子不能也堡乏統領之職而望豪強之  
用命難矣五不守也此謂不足以禦戎其五說如右何謂足以致寇兵  
法曰善守者藏于九地之下今有堡形而無禦之具則知其堡之中有  
大姓焉邊警未必來而寇之招矣又曰無借人利器中原草寇遊沒無  
跡苟信宿而風靡焉是授之寓矣又曰田里相伍其約束符信也里有  
周垣不得相過其隊分也今議守道驅集四鄉棄其室家之衆而斂之  
一堡之中身內而情外義分而勢必潰是盜之藪也此謂足以致寇其  
三說如右何謂不足以忠國禦戎之道古雖無上策也未聞其以堡也  
今議中原皆堡畿甸皆堡又議京城築外羅城臨清州築外羅城敵未

門屏之闕而捫首堂奧之早太平一統之秋而踟躇歎綏之甚此亦可  
使聞于虜庭也此一說也古者城制未遑于城有士近代城垣倍蓰古  
世而戰士謀夫萬一不古若也乃釋可講而務立堡焉消人敵懷之心  
而形此狐鼠之態何示人以無氣也此一說也九邊之限天設之險不  
此之恃而縱虜入我之深其關隘又何在也而何有于堡此三說也古  
人有曰聖人居之不以室宅守之不以城郭兵法亦言守具未足薪水  
不供雖有高城宜棄勿守然則守道在人不在城有城而弗人也城無  
爲也矧有堡無人城也此四說也夷性不善攻城前世明將必以奇制  
之今不中國之智之技是求而動縮千里之首苟敵之果迫又安策也  
此五說也此爲不足以忠國其五說如右

往行

徵調

前言

胡世寧曰自古京軍最懼遠征客兵尤忌長屯故隋末盜賊起于征遼

唐季叛卒起于戍廣今發京軍遠征延綏經年不還割心腹以救四肢誠非計也况邊境有急請調京軍往來奏覆緩不及事愚以爲莫若自今分定在京直隸衛所官軍止應宣府遼東山西衛所官軍專應大同陝西衛所官軍各從所近策應延綏寧夏甘肅量出征不遠屯戍不久平時無事則止今邊軍操守有事緊急除遼東宣府必須奏請京畿官軍出援外其餘各總兵官一面奏聞一面徑調該衛官軍前去策應固不必命廷臣以撓其權出京軍以分其食而京制已定緩急有特外侮不能侵越矣

倪岳曰延綏邊也而去京師遠宣府大同亦邊也而去京師近于彼既有門庭之喻則此當爲陞楯之嚴矣頃以兵部議遂于宣府出兵五千大同出兵一萬并力以援延綏而不知其相去旣遠往返不時人心厭于轉移馬力罷于奔軼况聲東擊西虜人之常批亢擣虛兵家之算精銳旣盡而西老弱乃留于北萬一此有警彼未可離首尾受敵遠近俱患亦豈計之得乎

卷之六十五

往行